

18. November

Pisortanit ikiorsiissutitut malittarisassanik qanoq ililluta sukaterisinnaavugut kiisalu qanoq pitsanngorsarsinnaanerigut apeqquteqaat aallaavigalugu oqallinnissamik siunnersuut, taamaalilluta suliffissaaleqisunut atugassaritaasut pitsanngorsarnissaat kiisalu utaqqiinnartunngortitsinaveersarneq anguniarlugu.

(Inatsisartunut ilaasortaq Peter Olsen, Inuit Ataqatigiit)

Peter Olsen Inuit Ataqatigiinneersup oqallisissiasatut siunnersuutaa Siumumiit nuannaarutigalugu imak oqaaseqarfigissavarput.

Oqallisissiaq soqutiginarluinnartuuvoq, qujamasuutigarpullu ammasumik oqallisiginissaanut periarfissaq manna atorlugu isummorsinnaassagatta. Qulequttami pineqartup iluani nunatsinni atukatta ilaat ersarissut ammasumilli oqallisiginngisarput siammarternissaanut periarfissaq atorluar-nissaanut Siumumiit qilanaarluta oqalliseqataassaagut.

Siumut isumaqarpoq inunnik isumaginninnikkut sullissinerit ikiorsiisernerillu tamarmik, naatsor-sueriaatsit naleqassutsimik aallaaveqartut sakkugalugit, ingerlaavartumik nalilersorneqartariaqartut naleqqussartariaqartullu. Taamaaliornikkut nunatsinni sullinneqartut tamanut sullissineq pitsaaner-paaq naligiinnerusorlu anguneqassasoq. Tamannalu ineriartortinneqassasoq Namminersorlutik Oqartussat kommunillu suleqatigiinnerisigut. Isumaginninnikkut sullissineq imminut ikiornissam-mik aallaartillugu ingerlanneqassasoq.

Oqallisissiami inuit pisortanit ikiorsiissutinik isumalluuteqalersimasut tikkuarneqarput, allaat sule-rusussuseq pigiunnaarlugu pisortaniit pilersorneqarnissaq annermik isumalluutitut napassutaalersi-masutut isikkoqalersillugu. Tamanna nunatta iluani sumiiffinni assigiinngitsuni atugaasoq miser-ratigineqarsinnaanngitsumik naammattuugassaajuaannalersimanera ilisimavarput. Sooq sulerusu-nnginnertik pillugu utoqqatsissutit tusartuarpagut. Suliffiit nikerartut, suliffimminni pimoorussis-inaannginnertik allat pisuussutigigaat, allallu taakkuusut suliffissaarunnerannik pisuusut. Naanguna imminut qiviarneq? Naanguna iluarsiinissami ujartuineq? Naanguna akisussaaqataaneq?

Nuannaarutigalugu Siumumiit erseqqissarusupparput isumarput allanngorsimanngimmat. 2012-mi ukiakkut ataatsimiinnermi Demokraatit siunnersuutigisimasaanut tunngatillugu Siumumiit inatsisartuni ilaasortarisimasatta Siumut sinnerlugu oqaaseqaammimi imak oqariartuuteqarnera:

Issuaavunga Siulittaasoq:

”Nunatsinni inuuniarnikkut ilisarnaatigaarput nammaqatigiinneq. Paasinnittaaserpullu malillugu nammaqatigiinneq tassassariaqarpoq timikkut eqqarsartaatsikkullu peqqissut tamarmik ikioqatigiillutik nammaqatigiinnerat, imaanngitsoq eqiasuinnerit kisimik nammattuussasut”

Aamma:

”Naatsumik oqaatigalugu, inuiaqatigiittut pisussaaffeqartariaqarpugut pisinnaatitaaffeqaannarata! Aammalu angajoqqaatut perorsaanitsinni qitornatta nammineersinnaallutik suliffimmullu ataqqin-nissuseqarlutik allanillu isumalluuteqaratik imminulli ilaquuttaminnullu pilersuisussaasutut pisus-saaffilersorlugit perortinnissaat sulissutigiuartariaqaripput.”

Issuaaneq naavoq:

Eqqaasissutigisariaqarparpulli inuit ilaqarmata Pisortat ikiorsiissutaannik pisariaqartitsivittunik. Ilisimatitsissutigerusupparalu Ilaqutariinnermut, Kultureqarnermut, Ilageeqarnermut Naligiisitaa-nermullu Naalackersuisoqarfik Marts 2013 Pisortanit ikiorsiissutit pillugit peqqussummut ilitser-suummik saqqummiussaqaarnikummat. Uanili peqqussutip pitsanngorsaqqissinnaanera anguniar-lugu iluarsarneaqqissinnaaneralu pillugit Naalackersuisut Kommunillu suleqatigiinnerisigut ersa-rinnerusunik sukumiinerusunillu sulissuteqarumallutik suliniuteqarnissamik siunniussisoqarmat.

Tamanna isumalluarnartutut isigisariaqartoq Siumut isumaqarpoq.

Inoqativut ilatsiinnartunngortissanngikkutsigit pitsanngorsaajuartariaqarpugut. Taamaassorisagullu pillugit tunuarsimaarata isummorsinnaasariaqarpugut. Suliassarlu tullinnguuttoq tassaasariaqar-poq inatsisitigut sukatereqqinnissaq aammalu pitsanngoriaaqqinnissaq. Tamannalu Siumumiit suleqataaffigissavarput.

Kukkuffitsigut kisiat uparuartuinissarput tappiffigivallaqaarput, tamannalu inuit taqittarnerisa ilaa-niippoq piunassuseerutsitineq. Tamatumalu kingunipilui ullumikkut inoqatitsinni atugaasut takuju-artalerpagut. Illussarmi napparneqarsinnaanngilaq toqqavia qularnaarneqanngikkuni, taannaavorlu aallartiffissaq. Suleqatigiinnikkullu angusassat siunnerfiillu qarmatut ataatsimoorfigisariaqarpagut. Taamaattumik Siumumiit upperaarput ilatsiinnartunngortussatut inissittussaagaluit inississimasullu ikaarsaarfimmuut tullermut kaammattortarnissaannut eqqaasittassallugit aammalu pilersaarudioqati-gisinnaasassallugit. Minnerunngitsumik soorunami aamma iliuuseqaqataaffigisassallugit. Ataatsimoornermi nukittuunngortitsisarmat. Illua tungeriikkaannimi imaanngilaq akerariinnerusoq, muminganili isumaqarpoq nukittuffigut ataatsimut pilersittariaqarigut.

Nuannaarutigeqaarput Peter Olsen-ip oqallisissiaq una saqqummiuummagu, takutippaa pilersikkusu-tarput qanoq ataatsimoorfiginissaa pingaaruteqartigissusianik. Qujavugullu Siumumiit oqalliseqa-taasinnaagatta.

Laura Táunâjik
Siumut